

Na osnovu člana 42. Zakona o mikrokreditnim organizacijama ("Službene novine Federacije BiH", broj 59/06), člana 4., 9. i 25. Zakona o Agenciji za bankarstvo Federacije BiH ("Službene novine Federacije BiH", broj 9/96, 27/98, 20/00, 45/00, 58/02, 13/03, 19/03, 47/06 i 59/06) i člana 18. Statuta Agencije za bankarstvo Federacije BiH ("Službene novine Federacije BiH", broj 42/04), Upravni odbor Agencije za bankarstvo Federacije BiH na sjednici održanoj 14. marta 2007. godine, donosi

## **ODLUKU**

### **O UVJETIMA I POSTUPKU ZA IZDAVANJE DOZVOLE ZA RAD I SAGLASNOSTI ZA STICANJE VLASNIČKIH UDJELA ULAGANJEM I PRIJENOSOM IMOVINE MIKROKREDITNE FONDACIJE**

#### **I. OPĆE ODREDBE**

##### Član 1.

Ovom Odlukom Agencija za bankarstvo Federacije BiH (u daljnjem tekstu: FBA) definiše opće uvjete i postupak izdavanja:

1. dozvole za rad mikrokreditnom društvu (u daljnjem tekstu: MKD) nastalom ulaganjem i prijenosom imovine mikrokreditne fondacije (samostalno ili zajedno sa drugim domaćim i stranim fizičkim i pravnim licima) i
2. saglasnosti za sticanje vlasničkog udjela mikrokreditne fondacije (u daljnjem tekstu: MKF) koja ulaže i prenosi imovinu u postojeće MKD i značajnog vlasničkog interesa domaćih i stranih pravnih i fizičkih lica u ovom procesu.

#### **II. IZDAVANJE DOZVOLE ZA RAD**

##### Član 2.

Ovlašćeno lice MKF prilikom ulaganja i prijenosa imovine za osnivanje novog MKD podnosi FBA zahtjev za izdavanje dozvole za rad MKD i uz njega dostavlja:

1. ovlaštenje za lice sa kojim će FBA surađivati u postupku razmatranja zahtjeva za izdavanje dozvole,
2. odluku MKF o osnivanju MKD ulaganjem i prijenosom imovine,
3. osnivački akt novog MKD, potpisan od ovlaštenog lica MKF i drugih osnivača, koji obavezno sadrži sve elemente iz člana 4. Odluke o uvjetima i postupku izdavanja i oduzimanja dozvole za rad i drugih saglasnosti mikrokreditnim organizacijama (u daljnjem tekstu: Odluka),
4. prijedlog statuta MKD, koji obavezno sadrži sve elemente iz člana 6. Odluke,
5. popis osnivača MKD sa naznakom uloga u novcu koji svaki uplaćuje, a ako se u novoosnovano društvo unose stvari i prava njihovu procjenu od eksternog revizora za pravna lica, odnosno sudskog vještaka za fizička lica,
6. izjave osnivača o porijeklu novčanih sredstava - izvorima za uplatu, uz navođenje da ista nisu obezbijedena po osnovu člana 26. stav 4. Zakona o mikrokreditnim organizacijama,
7. revidirani finansijski izvještaj MKF koji nije stariji od 6 (šest) mjeseci u momentu predavanja zahtjeva i opise metoda na temelju kojih je utvrđena vrijednost i alokacija imovine koja se prenosi i vrijednost vlasništva koje stječe MKF u MKD, posebno u odnosu prema uloženoj vrijednosti imovine i vlasništva koje stječe i svako drugo lice u ovom postupku, te dokaze o saglasnosti vjerovnika za prijenos imovine,
8. dokaze o školskoj spremi (diploma o završenoj VSS), stručnim kvalifikacijama i radnom iskustvu (najmanje 3 godine na istim ili sličnim poslovima) za direktora i izvršne direktore MKD, te izvode iz kaznene evidencije za ova lica,
9. podatke o školskoj spremi, stručnim kvalifikacijama i radnom iskustvu i izvode iz kaznene evidencije za članove nadzornog odbora MKD, zu uvjet da više od jedne polovine članova nadzornog odbora mora imati diplomu o završenoj VSS i najmanje tri godine radnog iskustva,

10. poslovni plan MKD za prve 3 godine poslovanja sa opisom djelatnosti kojima će se baviti, očekivanim ciljanim tržištem, projektovanim stopama rasta aktive i pasive, projektovanim početnim bilansom stanja i projekcijom bilansa stanja i bilansa uspjeha za navedeni vremenski period, te politikama obezbjeđivanja sredstava za kreditnu aktivnost i davanja kredita (definisati profile korisnika kredita), kao i formiranje i održavanje rezervi za kreditne gubitke,
11. podatke o poslovnom prostoru, tehničkoj i kadrovskoj osposobljenosti za obavljanje poslova.

#### Član 3.

MKF koja po odredbama ove Odluke osniva novo MKD zajedno sa drugim domaćim i stranim fizičkim ili pravnim licem mora steći vlasnički udjel od najmanje 51% kapitala u novoosnovanom MKD.

Ukoliko novo MKD osnuju dvije ili više MKF po odredbama ove Odluke, smatra se da je zadovoljen uvjet iz stava 1. ovog člana, ako zbir vlasničkih udjela ovih MKF prelazi 51% kapitala u novoosnovanom MKD.

### III. IZDAVANJE SAGLASNOSTI

#### Član 4.

MKF može ulaganjem i prenosom imovine sticati vlasnički udjel od najmanje 51% kapitala postojećeg MKD.

MKF uz zahtjev za izdavanje saglasnosti za sticanje vlasničkog udjela iz stava 1. ovog člana, FBA dostavlja:

1. ovlaštenje za lice sa kojim će FBA saradivati u postupku razmatranja zahtjeva za izdavanje saglasnosti,
2. odluku o ulaganju u drugo MKD prijenosom dijela imovine sa analizom koja sadrži pokazatelje kako će se ulaganje odraziti na poziciju kapitala i ostalih propisanih standarda poslovanja MKF,
3. revidirani finansijski izvještaj MKF koji nije stariji od 6 mjeseci u momentu predavanja zahtjeva i opise metoda na temelju kojih je utvrđena vrijednost i alokacija imovine koja se prenosi i vrijednost vlasništva koje stječe MKF u MKD, posebno u odnosu prema uloženoj vrijednosti imovine i vlasništva koje stječe svaki drugi sudionik ako ih ima više u ovom postupku, te dokaze o saglasnosti vjerovnika za prijenos imovine,
4. upis u registar kod nadležnog suda MKD u koje se vrši ulaganje,
5. plan poslovanja MKD,
6. podatke o stručnim kvalifikacijama i radnom iskustvu postojećih vlasnika preko 10%, članova nadzornog odbora, direktora i izvršnih direktora MKD u koje se vrši ulaganje,
7. revidirane finansijske izvještaje MKD za posljednje 3 (tri) poslovne godine.

#### Član 5.

U slučaju da, po odredbama ove Odluke, domaće ili strano pravno lice zajedno sa MKF osniva novo MKD u kojem će steći značajan vlasnički interes preko 10% kapitala, ili će steći značajan vlasnički interes preko 10% kapitala postojećeg MKD, FBA uz zahtjev za sticanje značajnog vlasničkog interesa dostavlja:

1. registraciju kod nadležnog organa,
2. odluku nadležnog organa o sticanju značajnog vlasničkog interesa učešćem u osnivanju MKD, ili ulaganjem u postojeće MKD,
3. revidirane finansijske izvještaje o svom poslovanju u posljednje 3 godine, kao i posljednji periodični finansijski izvještaj (nerevidiran),
4. procjenu vrijednosti stvari i prava od eksternog revizora, ako se ista ulažu u kapital MKD sa opisom metoda na temelju kojih je utvrđena vrijednost kapitala koji stiče,
5. izjavu o porijeklu novčanih sredstava - izvorima za uplatu, uz navođenje da ista nisu obezbijedena po osnovu člana 26. stav 4. Zakona o mikrokreditnim organiza- cijama.

## Član 6.

U slučaju da, po odredbama ove Odluke, domaće i strano fizičko lice zajedno sa MKF osniva novo MKD u kojem će steći značajan vlasnički interes preko 10% kapitala, ili će steći značajan vlasnički interes preko 10% kapitala postojećeg MKD, FBA uz zahtjev za sticanje značajnog vlasničkog interesa dostavlja:

1. kopiju lične karte ili pasoša, sa potvrdom mjesta boravka,
2. potvrdu o plaćenom iznosu poreza na prihod za posljednje 3 godine,
3. dokaze o svojim stručnim kvalifikacijama (diploma) i radnom iskustvu, te Izvod iz kaznene evidencije,
4. dokaze o vlasništvu u drugim pravnim licima,
5. izjavu o zaduženjima kod drugih MKO ili banaka,
6. izjavu o porijeklu novčanih sredstava - izvorima za uplatu, uz navođenje da ista nisu obezbijedena po osnovu člana 26. stav 4. Zakona o mikrokreditnim organizacijama,
7. procjenu vrijednosti stvari i prava od ovlašćenog sudskog vještaka, ako se ista ulažu u kapital MKD.

## IV. POSTUPAK IZDAVANJA DOZVOLE I SAGLASNOSTI

### Član 7.

FBA po prijemu zahtjeva iz ove Odluke vrši obradu istog, utvrđujući usklađenost zahtjeva i priložene dokumentacije sa zakonom i ovom Odlukom.

FBA može kao dodatne mjere:

- obaviti razgovor sa predstavnicima MKO,
- izvršiti kontrolu na licu mjesta,
- tražiti dopunu i druge dokumentacije po potrebi,
- tražiti provjeru ili potvrdu finansijskih podataka baziranih na trenutnom i prethodnom stanju.

FBA ima diskreciono pravo procjene metoda na temelju kojih je utvrđena vrijednost planiranog prijenosa imovine i obaveza, u skladu sa članom 38. stav 1. Zakona o mikrokreditnim organizacijama. U slučaju sumnje u realnost procjene ove vrijednosti, FBA može angažovati drugog eksternog revizora na trošak MKF za izvođenje nove procjene.

### Član 8.

FBA o odobravanju ili odbijanju zahtjeva za izdavanje dozvole i saglasnosti iz ove Odluke odlučuje rješenjem koje donosi u roku od 60 dana od dana prijema urednog i potpunog zahtjeva.

FBA može odbiti zahtjev za izdavanje dozvole i saglasnosti ukoliko MKO ne ispuni uvjete propisane članom 22. tač. 1., 2. i 3. Odluke.

FBA može oduzeti dozvolu MKF u slučaju da postoji neki od razloga iz člana 26. Odluke.

Podnosilac zahtjeva dužan je za izdavanje rješenja platiti naknadu utvrđenu u posebnoj zaključku FBA, u skladu sa Odlukom o naknadama koje mikrokreditne organizacije plaćaju Agenciji za bankarstvo Federacije BiH.

### Član 9.

U slučaju da podnosilac zahtjeva nije uz zahtjev dostavio svu potrebnu dokumentaciju ili informacije FBA može tražiti dopunu zahtjeva i odrediti rok za istu.

Ako podnosilac zahtjeva ne dostavi tražene dokumente ili informacije u propisanom roku, FBA će zahtjev odbaciti rješenjem kao neuredan.

Član 10.

Rješenje FBA je konačno i protiv istog se može pokrenuti upravni spor tužbom pred nadležnim sudom.

## **V. PRIJELAZNE I ZAVRŠNE ODREDBE**

Član 11.

Ova Odluka stupa na snagu osmog dana od dana objavljivanja u "Službenim novinama Federacije BiH".

Broj 01-1-393-7/07  
14. marta 2007. godine  
Sarajevo

Predsjednik Upravnog odbora  
mr. **Eldar Arnautović**, s. r.

